

Perpinhan: la comuna blòca un projècte de collègi e licèu Bressola

Lo ret escolar en catalan fa sa denóncia contra l'executiu de Louis Aliot



Lo ret d'escòlas en catalan, Bressola, a decidit de sasir la justícia contra la comuna de Perpinhan per aver empedit la dobertura d'un projècte de collègi e licèu. Lo president de l'associacion, Joan-Sebastià Haydn, sa directritz Eva Bertrana e l'avocat perpignanés Guillem Nivet detalhèron aquel afar dijòus passat dins una conferéncia de premsa, [çò rapòrta La Clau](#). La Bressola a mai de 1000 escolans escolarizats en Catalonha Nòrd dins maitas escòlas mairalas e elementàrias e un collègi. Ara, per la dobertura d'un nòu collègi e un licèu a Perpinhan se deu batre amb l'anticatalanisme de l'extrèma drecha que govèrna la vila.

Lo projècte de collègi e licèu immersi en catalan se deviá realizar dins lo monastèri de Santa Clara. Lo sit religiós a barrat sas pòrtas après 750 ans de preséncia e la Bressola aviá pagat 60 000 èuros per ne securizar la crompa. Pasmens, la municipalitat, dirigida per Louis Aliot e lo Recampament Nacional, a decidit de far obstruccion a aquel projècte, en obtenent un drech de retractacion dels vendeires. La comuna d'extrèma drecha defend l'argument de la proteccion del patrimòni, mas "çò que vòlon es entrepachar lo projècte", çò assegura Nivet.

Bressola a cridat a una manifestacion dissabte 23 d'octòbre.